

Cun amur e «ConFuoco»

In dumengia da Tschinquaisma ha gnü illa baselgia a Sent ün concert cul ensemble da giuvenils «ConFuoco» da la Surselva Zürigaisa. Il concert cun instrumaints a corda ha impli la baselgia cun tuns amabels.

«Nus eschan furtünats da das-chair esser hoz quia illa baselgia San Lurench a Sent, davo cha nus ans vain preparats dal 2020 e 2021 per quist concert chi nun ha lura pudü gnir organisà causa corona. Nus eschan per la deschavla jada quia e spe- rain da giodair insembel cun vus üna saira paschaivla». Cun quists peds ha salü- dà la dirigenta Verena Zeller l'auditori

illa baselgia a Sent. Ils giuvenils da nouv fin 14 ons da la Surselva Zürigaisa han sco böt da gnir promovüts e sustgnüts musicalmaing. Els nüzzajan lur talent e sun pronts d'investir üna gronda part da lur temp liber per la musica. Pro las prou- vas e pro'ls concerts impredan els da surtour respunsabilità e da's coordinar cun oters. Els han absolt divers concerts in Svizra, ma eir in oters pajais e quai in- richischa ils giuvenils e tils dà curaschi pel avegnir. Alch han tuots da cumünan- za, nempe l'amur pella musica ed il gi- vüsch da far plaschair als audituors e quai – «ConFuoco». Organisats vegnan ils concerts illa baselgia a Sent da la So- cietà d'Ütil public e da Regula Ursprung.

Program musical varià

Al principi han las audituras ed ils audi- turs giodü ün'ouvra barocca da Giusep-

pe Torelli (1658–1709), in stil frances in üna baselgia predestinada per musica da tuot gener. Ün toc fich pretensius pels giuvenils chi han muossà lur abiltà in möd surprudent. Eir l'intunaziun

dals instrumaints a corda ed il tour res- guard ün sün tschel ha satisfat. Sco se- guond toc es stat d'udir la Hager Sinfo- nie da Wolfgang A. Mozart, cha quel ha scrit a Den Haag. In seguit ha l'en-

semble sunà üna cumposiziun d'ün cumponist da la Danemarca, Karl Mil- der, in möd romantic.

«Con Fuoco» ha eir sunà e chantà ün toc scrit da Domenic Janett chi ha pla- schü a l'auditori e procurà per grond applaus. Ün toc cun disonanzas, cun chant e cun sequenzas dals Fränzlis. Üna baselgia bain implida ha giodü ün'ura musica sunada cun corp ed or- ma da giuvenils da nouv fin 14 ons e cun üna dirigenta chi ha sustgnü e diri- gi «ConFuoco» cun gronda persvasiun.

Fundà l'ensemble dal 2005

La dirigenta Verena Zeller ha fat ils stü- dis a la Scoul'ota da musica a Turich e fingià d'ürant la scolaziun es ella gnüda tshernüda sco magistra da violina a la Scoul'ota da la Surselva Zürigaisa. Ella viva cun sia famiglia a Rüti. Verena Zel- ler ha fundà l'ensemble per giuvenils «ConFuoco» dal 2005. Ella ha dirigi e dirigia amo divers orchesters e fuorma- ziuns plü pitschnas in divers lös i'l chantun Turich.

Benedict Stecher/fmr



L'ensemble «ConFuoco» gioda l'applaus merità. fotografia: Benedict Stecher

Imprender meglder rumantsch

der Garten

biologisch anbauen

l'üert

cultiver / cultivar biologicamaing